

ES XES KIAS

Es Xes Kias, Zaj 1 thiab 2

Es Xes Kias pom Tswv Ntuj lub hwj chim. 1 : 1 - 5 + 10 - 14 + 24 - 28.

- 1** 1 Xyoo peb caug, lub plaub hlis, hnub xiab tsib, kuv nrog cov neeg raug txim khuam nyob pej kum teb, kuv nyob ze ntawm tus ntug dej Kes Npas, ces lub ntuj qhib plho thiab kuv yees pom tej Yam tuaj saum Ntuj tuaj.
2 Hnub xiab tsib ntawd, yog xyoo tsib uas tus vaj Yuas Kees mus nyob txim rau pej kum teb.
3 HUAB TAIS hais lus rau tus Leej Choj Es Xes Kias uas yog Npws Ntxis tus tub, nyob hauv cov Kas Des lub teb chaws, nyob ze tus dej Kes Npas.
Nyob ntawm tus ntug dej ntawd, HUAB TAIS txhais tes nyob saum kuv.
4 Kuv ntsia dheev, pom ib nthwv cua hlob tshuab pej fab tuaj, ib twv huab loj loj ci ci, ib lub cub tawg thiab ib co hluav taws ci cuag li tej kab xob laim, lub plawv cub tawg ntsa liab ploog.
5 Nyob hauv plawv cub tawg, kuv pom ib yam yog zoo li plaub tug tsiaj. Cov tsiaj ntawd muaj ib lub cev xws li neeg.
10 Ib tug tsiaj muaj plaub lub ntsej muag, ib lub ntsej muag yog neeg, ib lub ntsej muag yog tssov ntxhuav, ib lub ntsej muag yog heev nyuj, ib lub ntsej muag yog dav.
11 Cov tsiaj ntawd ib tug muaj plaub txhais tis, lawv cia ob txhais tis thaiv taub hau, ob txhais thaiv lub cev.
12 Lawv mus kev, lawv mus ncaj ncaj, lawv tsis lem rau sab xis los sab laug li. Lub tswv yim coj lawv mus qhov twg mas lawv mus qhov twg. Lawv mus, lawv tshais ruam nrawm cuag li xob laim.
13 Nyob hauv kis nruab nrab hauv plaub tug tsiaj ntawd muaj ib co hluav ncaig

cig cig ntaiv cuag li tej tes tsau. 14 Cov ncaig ntawd mus mus los los nyob hauv kis nruab nrab plaub tug tsiaj. Cov ncaig ntawd tawm txim cuag li xob laim.

24 Kuv hnov lawv cov tis nrov cuag li ib tug dej loj ntws, zoo li Sas Dais lub suab. Thaum lawv mus kev nrov cuag li cua hlob.

25 Thaum lawv so, lawv nkaum lawv cov tis. Thaum ntawd kuj nrov ib zaug thiab. 26 Nyob saum lub ru tsev ncaj saum lawv taub hau muaj ib yam zoo li ib lub pob zeb pov siav txawb ua ib lub theej kiab, nyob saum lub theej kiab muaj ib tug zoo li neeg.

27 Kuv pom nws ci cuag li nyiaj thiab kub, nyob ib ncig nws, txij ntawm lub ntsag rov yav saud, muaj ib yam zoo li hluav taws, txij ntawm ntsag rov hauv, muaj ib yam zoo li hluav taws.

28 Thiab muaj ib txog kab pom kev lug xws li zaj sawv saum ntuj thaum los nag tas. Yog zoo li HUAB TAIS lub hwj chim. Kuv ntsia ces kuv ntog hauv av thiab kuv hnov ib lub suab hais lus.

Es Xes Kias yees pom thiab noj ib phau ntawv. 2 : 8 - 10 + 3 : 1 - 4.

- 2** 8 Neeg leej tub, koj mloog kuv hais, koj tsis txhob tawv li cov neeg ntxeev siab. Koj rua ncauj noj qhov kuv yuav muab rau koj noj.
9 Kuv ntsia pom ib txhais tes cev ib phau ntawv kauv los rau kuv.
10 Nws muab phau ntawv nthuav rau kuv saib, phau ntawv ntawd sau sab saud thiab sab nraud huv si.
Cov lus sau rau hauv yog :
"Suab ntsaj, suab nyiav, suab quaj."

3 1 Nws hais rau kuv tias :

"Neeg leej tub, koj noj qhov kuv cev rau koj no, koj noj phau ntawv no thiab koj mus cuag cov His Xas Lais."

2 Kuv rua qhov ncauj ces nws muab phau ntawv rau kuv noj.

3 Nws hais rau kuv tias :

"Neeg leej tub, koj noj phau ntawv no. Koj noj kom tsau koj plab."

Ces kuv noj phau ntawv. Phau ntawv qab cuag zib ntab nyob hauv kuv qhov ncauj.

4 Nws hais rau kuv tias :

"Neeg leej tub, koj mus cuag His Xas Lais tsev neeg. Koj mus qhia kuv cov lus rau lawv."

**Cov His Xas Lais yuav tsis mloog
Es Xes Kias. 3 : 7 - 9.**

7 Neeg leej tub, His Xas Lais tsev neeg tsis xav mloog koj, vim nws tsis xav mloog kuv. His Xas Lais tsev neeg sawv daws hauv pliaj tawv, lawv siab twm xeeb.

8 Kuv yuav ua kom kuv ntsej muag tawv ib yam li lawv lub. Kuv ua kom kuv hauv pliaj tawv ib yam li lawv lub hauv pliaj.

9 Kuv ua kom koj hauv pliaj tawv li zeb dub uas nws tawv dua cov pob tsuas. Koj txhob ntshai lawv, txhob txhawj nyob ntawm lawv xub ntiag, vim lawv yog ib npoj neeg ntxeev siab.

**Es Xes Kias yog zoo li ib tug tub
zog Yaj Saub zov keeb . 3 : 16 - 21.**

16 Xya hnub dhau los lawm, HUAB TAIS thiaj qhib ncauj los hais rau kuv tias : 17 Neeg leej tub, kuv tsa koj ua tus zov keeb nyob hauv His Xas Lais tsev neeg. Thaum koj hnov kuv ib lo lus qhia tuaj ntawm kuv lub ncauj, koj yuav ceeb toom kuv lo lus rau lawv. 18 Yog kuv

hais rau tus neeg siab phem tias :

"Koj yuav tuag !" thiab koj tsis ceeb toom rau nws, koj tsis piav qhia rau tus neeg phem kom nws tso nws tus yam ntxwv phem tseg, kom nws tau rov muaj txoj sia, mas tus neeg phem ntawd yuav tuag mus vim nws cov txhaum, tab sis kuv yuav kom koj them nws nqe ntshav.

19 Yog tias koj ceeb toom rau tus neeg ntawd tas, nws ho tsis hloov nws lub siab phem thiab tus yam ntxwv phem, mas tus neeg ntawd yuav tuag vim nws cov txhaum, tab sis koj yuav tau cawm koj txoj sia.

20 Thaum ib tug neeg ncaj tso nws txoj kev ncaj tseg tig mus ua phem, kuv yuav cuab ntxiab tav nws kev, nws yuav tuag, vim tias koj tsis tau ceeb toom dab tsi rau nws, nws yuav tuag vim nws cov txhaum ces luag yuav tsis nco txog nws tej kev ncaj uas nws tau ua. Tab sis kuv yuav kom koj them nws nqe ntshav.

21 Yog tias koj twb ceeb toom rau tus neeg ncaj ntawd kom nws txhob ua txhaum ces nws tsis ua txhaum lawm, mas nws yuav muaj txoj sia ntxiv, vim nws hnov lo lus ceeb toom, thiab koj yuav tau cawm koj txoj sia.

**HUAB TAIS coj xwv txheej tuaj rau
Yes Lus Xas Les. 9 : 1 - 7.**

**9 1 HUAB TAIS qw nrov nrov
ntawm kuv pob ntseg tias :**

"Nej uas yog cov rhuav lub nroog, nej txav los ! Nej nyias tuav nyias rab pas."

2 Ces muaj rau tus txiv neej los pem lub qhov rooj sab pej los, ib leeg tuav ib rab qws ntawm tes. Nyob hauv nruab nrab lawv muaj ib tug neeg hnav ntaub dawb. Ntawm nws duav, nws sia ib daig phiaj xws li cov thoob xwm ntawv. Lawv chaws los sawv nyob ntawm lub rooj loog

txi Ntuj.

3 Tsoom His Xas Lais tus HUAB TAIS lub hwj chim nyob saum tus Tshiab Kes Lus Npis txav mus rau ntawm Tuam Tsev lub qhov rooj. Nws hu tus neeg hnav ntaub dawb uas sia ib daig phiaj thoob xwm ntawv ntawm dhuav. 4 Nws hais tias :

"Koj mus ncig lub nroog Yes Lus Xas Les kom thoob, koj sau ib tug txwm ntawv "T" rau saum cov neeg uas lawv quaj vim muaj tej yam phem uas tib neeg ua nyob hauv lub nroog."

5 Kuv hnov nws hais rau cov tuav rab qws tias :

"Nej lawv tus ntawd qab, nej ntaus sawv daws. Nej tsis txhob hhub, tsis txhob txuag leej twg. 6 Laus hluas, poj niam me nyuam, los nej muab lawv tua kom txhob tshuav ib tug. Tab sis tus ntoo ib lub cim "T" saum nws hauv pliaj mas nej tsis txhob kov nws. Nej pib ua ntawm kuv lub Tuam Tsev no mus."

Ces lawv pib tua cov laus nyob ntawm lub Tuam Tsev mus.

7 Nws tseem hais rau lawv tias :

"Nej tsis txhob txuag lub Tuam Tsev, nej ua kom muaj neeg tuag puv ntawm tej rooj loog. Nej tawm mus sab nraud thiab."

Ces lawv tawm mus ntaus hauv lub nroog huv tib si.

HUAB TAIS lub hwj chim tawm ntawm lub Tuam Tsev Teev Ntuj Yes Lus Xas Les mus. 10 : 18 - 22.

10 18 HUAB TAIS lub hwj chim nyob hauv lub Tuam Tsev Teev Ntuj txav ntawm taw qhov rooj los tsaws rau saum cov Tshiab Kes Lus Npis.

19 Kuv qhov muag pom cov Tshiab Kes Lus Npis nthuav tis ya plho mus lawm.

Cov log tsheb kuj ntog mus thiab. Lawv mus tsaws ntawm taw qhov rooj nyob sab toob fab. Tsoom His Xas Lais tus Tswv Ntuj lub hwj chim nyob saum lawv. 20 Yog tus tsiaj uas kuv tau pom nyob ntawm ntug dej Kes Npas nyob hauv qab cov His Xas Lais tus Tswv Ntuj. Ces kuv paub tias yog ib co Tshiab Kes Lus Npis. 21 Lawv muaj plaub lub ntsej muag, plaub txhais tis thiab lawv muaj ib co tes zoo li tes neeg nyob hauv cov qab tis. 22 Lawv cov ntsej muag yog zoo li cov ntsej muag kuv pom nyob ntawm tus dej Kes Npas. Lawv nyias mus ncaj ncaj rau pem nyias hauv ntej.

Cov neeg nyob txim hauv Npas Npis Los, muaj ib zaug lawv yuav rov los. 11 : 14 - 20.

11 14 Kuv txais HUAB TAIS ib lo lus zoo li no :

15 "Neeg leej tub, cov nyob hauv nruab nroog Yes Lus Xas Les hais rau koj kwv koj tig, koj niam koj txiv thiab rau tas tsoom His Xas Lais tsev neeg tias : 'Nej nyob deb ntawm HUAB TAIS mas ! Vim Ntuj tau muab lub cuab tam rau peb lawm !'

16 Kuv thiaj hais li no : HUAB TAIS Tswv Ntuj hais tias :

"Muaj li ntawd tiag ! Kuv tau ua kom lawv txav mus deb, lawv tawg mus nyob xyaw pej kum haiv neeg, kuv yog lawv lub tsev teev Ntuj, yuav yog zoo li ntawd ib ntus nyob hauv lub teb chaws lawv tuaj nyob. Es Xes Kias koj hais li no."

17 HUAB TAIS hais tias :

"Nej nyob hauv nruab nrab cov haiv neeg. Kuv yuav sau nej los nyob ua ke. Kuv yuav muab His Xas Lais teb rau nej.

18 Lawv yuav los. Lawv yuav rhoav txoj kev lwj thiab tej kab ke qias pov tseg.

19 Kuv yuav ua kom lawv thooj siab koom ntsws. Kuv yuav muab ib lub tswv yim tshiab nyob hauv lawv. Kuv yuav thau lub siab tawv li pob zeb ntawm lawv lub cev los.

20 Lawv yuav mus kev raws kuv cov cai, lawv yuav coj kuv lij choj. Lawv yuav mloog lus. Ces lawv yuav yog kuv haiv neeg, kuv yuav yog lawv tus Tswv Ntuj."

Es Xes Kias ua txuj tsiv.

12 : 1 -12.

12 1 Kuv txais HUAB TAIS ib lo lus zoo li no:

2 "Neeg leej tub, koj nyob hauv nruab nrab ib tsav neeg ntxeev siab, uas lawv muaj qhov muag, lawv ntsia taus, tab sis lawv tsis pom, lawv muaj pob ntseg, lawv mloog taus, tab sis lawv tsis hnov, vim lawv yog ib tsav neeg ntxeev siab.

3 Neeg leej tub, koj nog ib nras toob xib zoo li ib tug neeg mus nyob txim lawm pej kum teb, koj ua rau lawv pom. Koj tsiv ntawm qhov chaw koj nyob mus rau lwm qhov chaw, koj nyob ntawm qhov lawv pom. Nyaj tej zaus lawv yuav lees tias lawv yog ib tsav neeg ntxeev siab.

4 Nruab hnub, koj yuav nog nra xws li ib tug neeg mus nyob txim lawm pej kum teb rau lawv pom. Thaum tsaus ntuj, koj yuav tawm mus xws li ib tug neeg mus nyob txim rau lawv pom.

5 Koj tho ib lub qhov nyob ntawm phab ntsa rau koj tawm mus, koj ua rau lawv pom. 6 Koj kwv koj pob khaub ncaws saum xub pwg thiab koj maub tawm mus rau lawv pom. Koj yuav npog ntsej muag kom tsis txhob pom lub teb chaws. Vim kuv muab koj los ua ib lub cim qhia tsoom His Xas Lais."

7 Ces kuv ua raws li cov lus ceeb toom ntawd. Nruab hnub kuv nog nra xws li ib

tug neeg mus nyob txim pej kum teb. Thaum tsaus Ntuj, kuv xuas tes tho ib lub qhov nyob ntawm phab ntsa. Thaum tsaus ntuj nti lawm kuv maub tawm mus, kuv kwv kuv pob toob xib saum xub pwg rau lawv pom

8 Thaum sawv ntxov, HUAB TAIS hais rau kuv zoo li no :

9 "Neeg leej tub, His Xas Lais tsev neeg, tsav neeg ntxeev siab ntawd puas tau hais rau koj tias : Koj ua dab tsi li ntawd ?

10 Koj hais rau lawv tias :

HUAB TAIS Tswv Ntuj hais li no : cov lus ceeb toom no yog hais rau Yes Lus Xas Les thiab rau tas His Xas Lais tsev neeg. 11 Koj hais tias : Kuv yog ib lub cim qhia lawv. Kuv tau ua li cas mas lawv yuav raug li cas. Lawv yuav tau mus nyob txim lawm pej kum teb. 12 Tus ua vaj nyob hauv lawv yuav kwv nws pob toob xib saum xub pwg, nws yuav maub tsaus ntuj nti tawm ntawm lub qhov nws tho ntawm phab ntsa, nws yuav npog ntsej muag kom tsis txhob pom lub teb chaws."

Nyias ris nyias cov txhaum.

14 : 12 - 23.

14 12 Kuv txais HUAB TAIS ib lo lus zoo li no : 13 Neeg leej tub, thaum ib lub teb chaws ua txhaum rau kuv vim nws fav xeeb rau kuv, thiab kuv tsa tes ntaus nws rhuav nws tej txhab nplej, tso kev tshaib kev nqhis tuaj tua qas neeg qas tsiaj, 14 mas yog nyob hauv lub teb chaws ntawd muaj peb tug neeg zoo no : Nos Hes, Das Nias thiab Yob, mas peb tug neeg ntawd yuav cawm tau lawv txoj sia vim lawv ua ncaj. HUAB TAIS qhib lus zoo li ntawd.

15 Yog kuv tso cov tsiaj qus tom neeg tuaj ua kom cov me nyuam hauv lub teb

chaws ntawd puas, cov tsiaj ntawd los ua kom tsis muaj leej twg nyob taus thiab hla taus lub teb chaws ntawd, 16 mas yog muaj Nos Hes, Das Nias thiab Yob lawv peb leeg nyob hauv lub teb chaws ntawd, mas kuv tus HUAB TAIS Tswv Ntuj muaj txoj sia, kuv ceeb toom li no : lawv peb tug ntawd yuav cawm tsis tau ib tug tub los ib tug ntxhais, lawv tsuas cawm tau lawv xwb, hos lub teb chaws yuav ciaj suab puam suab zeb.

17 Yog kuv ua kom hniav ntaj hniav riam poob rau hauv lub teb chaws ntawd, thiab yog kuv hais tias :

"Kom hniav ntaj hniav riam chaws mus hauv lub teb chaws ntawd tua qas neeg qas tsiaj."

18 Tab yog muaj peb tug neeg ntawd nyob hauv lub teb chaws, mas kuv yog tus HUAB TAIS Tswv Ntuj muaj sia, kuv ceeb toom li no : peb tug ntawd yuav cawm tsis tau ib tug tub los ib tug ntxhais, lawv tsuas cawm tau lawv xwb.

19 Yog kuv tso tus mob aws rau lub teb chaws ntawd thiab kuv npau taws ua lawv ntshav ntws kom txaus kuv siab, 20 kuv tua qas neeg qas tsiaj, yog Nos Hes, Das Nias thiab Yob nyob hauv lub teb chaws ntawd. Mas kuv, HUAB TAIS Tswv Ntuj muaj txoj sia, kuv ceeb toom li no : lawv yuav cawm tsis tau ib tug tub los ib tug ntxhais, tab sis lawv yuav cawm tau lawv txoj sia vim lawv siab ncaj.

21 HUAB TAIS Tswv Ntuj hais tuaj li no : Tab txawm yog kuv xa kuv plaub Yam xwv txheej uas muaj hwj xyeej txaus ntshai no, yam li hniav ntaj hniav riam, kev tuag tshaib tuag nqhis, tsiaj qus tsiaj tom neeg, zaj mob zaj aws, tab yog kuv xa plaub Yam no tuaj tua qas neeg qas tsiaj txhu nyob Yes Lus Xas Les, 22 tsuas tshuav ib pab seem tseem ciaj, yog ib cov tub ib co ntxhais tawm los

kom nej pom lawv tus yeeb yam thiab lawv tes dej num, ua chaw nplij nej kom nej txhob nco yam phem uas coj los nphav Yes Lus Xas Les.

23 Thaum nej yuav pom lawv tus yeeb yam thiab lawv tes dej num mas nej thiaj yuav paub tias txhua yam kuv ua nyob hauv Yes Lus Xas Les mas tsis yog kuv nkim zog dag. HUAB TAIS Tswv Ntuj ceeb toom li ntawd.

**Haiv His Xas Lais yog HUAB TAIS tus ntxhais uas nws tu kom hlob.
16 : 1 - 15 + 60 + 63.**

16 1 Kuv txais HUAB TAIS ib lo lus li no :

2 "Neeg leej tub, koj hais rau Yes Lus Xas Les kom nws paub nws cov txhaum teev dab."

3 Koj yuav hais tias :

"HUAB TAIS Tswv Ntuj hais li no rau Yes Lus Xas Les. Koj lub keeb thiab koj lub teb chaws yog lub teb chaws Kas Nas Has. Koj txiv yog ib tug As Mos, koj niam yog ib tug His Tis.

4 Hnub koj yug los, tsis muaj neeg txiav koj hlab ntaws, tsis muaj tus ntxuav koj, tsis muaj tus muab ntsev txhuam koj, tsis muaj tus qhwv koj.

5 Tsis muaj ib tug neeg tig ntsej muag ntsia koj thiab hhub koj, tu koj. Hnub koj yug los, lawv muab koj pov tseg rau hauv nruab liaj nruab teb vim koj qias lawv.

6 Kuv hla ze ntawd, kuv pom koj nti lui luam lo ntshav li. Ces kuv hais rau koj tias : 'Koj ciaj mog !' 7 Kuv tau ua kom koj hlob mos nyooos tuaj xws li nroj nyob nruab liaj nruab teb. Ces koj hlob tuaj, koj hlob mus tiav nkauj, koj ob lub mis pib o, koj plaub hau ntaw tuaj. Tab sis koj nyob liab qab ploog. 8 Kuv hla tuaj ze ntawm koj, kuv pom koj. Thaum ntawd

yog koj lub caij, yog lub caij sib nyiam.
Kuv nthuav kuv lub tsho tshaj sab los
npog koj. Kuv nrog koj cog lus ces koj
ua kuv tug lawm. Yog HUAB TAIS
Tswv Ntuj lo lus.

9 Kuv muab koj da dej, kuv ntxuav cov
ntshav lo koj, kuv muab roj pleev koj.

10 Kuv muab paj ntaub rau koj hnav,
muab khau tawv zoo nkauj rau koj rau,
muab ib txog phuam rau koj ntoo thiab ib
lub tsho tsuj rau koj hnav.

11 Kuv muab nyiaj rau koj coj ntawm caj
dab, muab sawv kub rau koj coj ntawm
tes.

12 Kuv ntxig ib lub kauj rau ntawm koj
qhov ntswg, ib co npauj rau koj pob
ntseg, kuv txawb ib lub mom teev kub ci
ntsais plias rau saum koj taub hau.

13 Koj ua zam tsuj zam npuag coj nyiaj
coj kub xwb. Koj noj hmoov nplej mos
mos, haus zib ntab zib mu. Koj zoo nkauj
zuj zus, ces koj tau sawv caij vaj.

14 Txhia haiv neeg cav txog koj zoo
nkauj, vim kuv muab kuv lub hwj chim
rau koj hnav.

Yog HUAB TAIS Tswv Ntuj lo lus.

15 Tab sis koj muab hlob vim koj lub
meej mom zoo nkauj. Koj coj koj lub
koob meej mus taug txoj kev lwj, koj cev
koj rau txhia leej txhua tus.

60 Tab sis kuv yuav nco ntsoov lo lus
kuv tau nrog koj cog thaum koj tseem
hlucas. Kuv yuav cog ib lo lus ruaj mus li
rau koj.

63 Ces koj yuav rov nco txog. Koj yuav
txaj muag. Thaum kuv zam koj cov
txhaum rau koj tas, mas koj yuav ua twj
ywm."

Yog HUAB TAIS Tswv Ntuj lo lus.

**Tswv Ntuj haiv neeg zoo li ib tug
ceg ntoo yuav hlob mus ua ib tug
ntoo loj. 17 : 22 - 24.**

**17 22 HUAB TAIS Tswv Ntuj hais
zoo li no :**

"Kuv yuav nrhiav tus ntoo faj khaum loj
dua cov, nyob saum nws lub ntsis kuv
yuav de tus ceg siab dua cov, kuv yuav
coj mus cog nyob saum ib lub ncov roob
siab tshaj.

23 Kuv yuav cog tus ceg ntawd nyob
saum lub roob His Xas Lais siab siab.
Nws yuav ncau ceg thiab txi txiv. Nws
yuav hlob mus ua ib tug ntoo faj khaum
zoo saib.

Tas txhia tsav noog yuav tuaj nkaum hauv
nws. Lawv yuav tuaj so hauv nws tej qab
ceg qhov ntxoov.

24 Tas txhia Yam ntoo tuaj nyob nruab
liaj nruab teb yuav paub tias tus ua kom
cov ntoo siab qis tuaj thiab ua kom cov
ntoo qis siab tuaj yog kuv, HUAB TAIS.
Sawv daws yuav paub tias tus ua kom tus
ntoo ntsuab qhuav tuaj thiab ua kom tus
ntoo qhuav rov ntsuab tuaj yog kuv.
Kuv yog HUAB TAIS, kuv hais yam twg
kuv yuav ua yam twg."

Nyias ris nyias lub txim txhaum.

18 : 1 - 10 + 13 + 20 - 28 + 30 - 32.

**18 1 Kuv txais HUAB TAIS ib lo lus
zoo li :**

2 Tim li cas njaj hnub nej hais zaj paj
lug no nyob His Xas Lais teb :

"Vim phaj txiv noj txiv qauba, phaj tub
thiaj yuav rhiab hniav."

3 Kuv yog tus HUAB TAIS Tswv Ntuj
muaj sia ! Kuv cog lus tias txij no mus
lawm yav tod, nej yuav tsis txhob hais zaj
paj lug ntawd ntxiv.

4 Vim leej twg txoj sia los kuj puav leej
nyob hauv kuv txhais tes tas huv tib si.
Phaj txiv t xoja sia kuj yog kuv tug. Phaj
tub t xoja sia kuj yog kuv tug. Tus twg ua
txhaum mas yog tus us ntawd yuav tuag.

- 5 Ib tug neeg siab ncaj, nws coj txoj kev ncaj kev ncees.
- 6 Nws tsis noj tej txhiam xws txi dab saum tej ncov roob, nws tsis tsa muag ntsia cov mlom nyob His Xas Lais teb, nws tsis zes luag poj luag sev. Tas lub caij poj niam cev tsis huv, nws caiv txaj.
- 7 Nws tsis hiam leej twg, nws muab yam twg los yuam nuj nqe mas nws xa rov qab tib si. Nws tsis ua tub sab tub nyiag. Nws pub nws cov mov rau cov neeg tshaib noj, pub ris tsho rau tus neeg liab qab hnav.
- 8 Txais nyiaj rau luag, nws tsis noj paj. Nws nkaum nws txhais tes kom txhob tau ua ib yam phem, nws txiav txim rau luag nws txiav ncaj.
- 9 Nws coj ib tug yam ntxwv haum Txoj Cai, nws mloog cov lij choj. Nws ua raws txoj kev tseeb tiag. Ib tug neeg ua li ntawd nws lub siab ncaj siab ncees tiag, nws yuav muaj txoj sia. Yog HUAB TAIS Tswv Ntuj lo lus.
- 10 Tab sis yog tus neeg ncaj ntawd nws yug tau ib tug tub siab phem siab nyos. Nws ua cov txhaum ntawd, 13 mas tus tub ntawd yuav tsis ciaj, nws yuav tsum tuag, nws cov ntshav yuav rov poob rau saum nws xwb.
- 20 Tus yuav tuag yog tus ua txhaum. Tus tub yuav tsis ris tus txiv cov txhaum. Tus txiv yuav tsis ris tus tub cov txhaum. Tus muaj ib lub siab ncaj mas nws cov hauj lwm ncaj yuav raws nws nraim.
- 21 Tus muaj ib lub siab phem yog nws tseg tsis ua txhaum, nws coj cov lus qhia thiab nws ua raws nraim txoj kev ncaj kev ncees, mas nws yuav muaj txoj sia, nws yuav tsis tuag. 22 Kuv yuav tsis nco txog nws cov txhaum, nws yuav ciaj vim nws ua raws txoj kev ncaj.
- 23 HUAB TAIS Tswv Ntuj hais tias : "Yog kuv pom cov neeg txhaum tuag, mas kuv yuav zoo siab puas tau ? Kuv kawg xav pom tus neeg txhaum hloov siab kom nws tau muaj txoj sia nyob.
- 24 Tab sis yog tus neeg siab ncaj nws ncaim ntawm txoj kev ncaj thiab nws mus ua txhaum xws li cov neeg tsis hwm Ntuj lawv ua kam, mas tus neeg ntawd nws puas tsim nyog muaj txoj sia nyob ? Nws cov hauj lwm zoo uas thaum ub nws ua, mas kuv yuav tsis nco txog. Nws yuav tuag nyob hauv nws txoj kev ntxeev siab thiab hauv nws txoj kev txhaum.
- 25 Tim li cas nej yuav muaj cuab kav hais tias HUAB TAIS ua tsis ncaj ? His Xas Lais, nej mloog zoo zoo, puas yog kuv ua tsis ncaj ? Ntshai yog nej ua tsis ncaj los tsis sub ?
- 26 Tus neeg siab ncaj nws ncaim ntawm nws txoj kev tsis ncaj lawm, nws ua txhaum, nws yuav tuag nyob hauv nws txoj kev ua txhaum.
- 27 Tus neeg siab phem nws tso nws txoj kev phem pov tseg, nws los ua qhov ncaj qhov tsim nyog ua, nws txoj sia yuav nyob. 28 Nws pom dheev nws cov txhaum thiab nws tso nws txoj kev phem pov tseg, mas nws yuav tsis tuag. 30 Tus HUAB TAIS Tswv Ntuj hais zoo li no : Cov His Xas Lais, kuv yuav muab txim rau nej raws li nyias tus yam ntxwv. Nej yuav tig los yuav lub siab tshiab, nej yuav tso nej cov txhaum pov tseg, kom tsis txhob muaj kev rau nej ua phem ntxiv.
- 31 Nej thim cov txhaum uas nej ua rau kuv, nej rov yuav ib lub siab thiab ib lub tswv yim tshiab mog ! Cov His Xas Lais, vim li cas nej thiaj li yuav xaiv txoj kev tuag ?
- 32 Tab yog leej twg tuag, mas kuv tsis zoo siab pom nws tuag ! Nej kav tsij tig los yuav lub siab tshiab, ces nej yuav ciaj !" Yog HUAB TAIS Tswv Ntuj lo lus.

**Es Xes Kias poj niam tuag, ua piv
txwv qhia cov His Xas Lais.
24 : 15 - 24.**

24 15 Kuv txais HUAB TAIS lo lus
zoo li no :

16 "Neeg leej tub, tus uas koj qhov muag
xav pom mas kuv yuav thanu nws mus, koj
yuav tsis pom ntxiv. Tab sis koj yuav tsis
txhob quaj tsis txhob nyiav, koj yuav tsis
txhob ua kua muag poob.

17 Koj yuav quaj twj ywm. Koj tsis
txhob ntoo xyom. Koj yuav muab koj txoj
phuam los ntoo. Koj muab koj nkawm
khau los rau li qub. Koj tsis txhob npog
hwj txwv. Koj tsis txhob noj cov mov
pam tuag."

18 Thaum sawv ntxov kuv tseem hais lus
rau tsoom sid, thaum tsaus ntuj kuv poj
niam tuag. Tag kis sawv ntxov kuv ua
raws li HUAB TAIS xub qhia rau kuv.

19 Ces tsoom sid nug kuv tias :

"Koj ua li ntawd, koj puas yuav piav qhia
peb tias koj xav qhia dab tsi rau peb ?"

20 Kuv teb lawv tias :

"Kuv txais HUAB TAIS ib lo lus zoo li
no : 21 Koj hais rau His Xas Lais tsev
neeg tias : HUAB TAIS Tswv Ntuj hais li
no:

Kuv yuav rhuav kuv lub tsev, uas nej
khav tias yog nej qhov chaw muaj zog,
yog nej qhov chaw vam khom, thiab yog
lub tsev nej qhov muag xav pom. Nej
cov tub cov ntxhais uas ncaim nej lawd
lawv yuav raug ntaj tua lawv.

22 Thaum ntawd nej yuav ua zoo li kuv
ua no :

Nej yuav tsis txhob npog hwj txwv, tsis
txhob noj cov mov pam tuag,

23 Nej yuav ntoo phuam, nej yuav rau
khau. Nej yuav tsis txhob quaj, tsis txhob
nyiav. Nej yuav raug tuag zuj zus vim
nej ua txhaum. Nej sawv daws yuav ntsaj

txog cov tuag heev zuj zus."

24 Es Xes Kias yog ib tug piv txwv ua
npog. Thaum muaj tej xwm li ntawd
tshwm sim, nej yuav paub tias kuv yog
HUAB TAIS Tswv Ntuj.

**Tswv Ntuj yuav muab txim rau tus
vaj kav Tws Los. 28 : 1 - 10.**

28 1 Kuv txais HUAB TAIS ib lo lus
zoo li no :

2 "Neeg leej tub, koj hais rau tus vaj
nyob Tws Los tias :

HUAB TAIS Tswv Ntuj hais li no :
'Vim koj muab hlob, koj hais tias kuv yog
ib tug tswv ntuj, kuv nyob txawm hauv ib
lub tsev phim huab tais, nyob hauv plawv
lub hiav txwv.' Tab sis koj tsuas yog ib
tug neeg xwb. Koj khav tias koj yog tswv
ntuj.

3 Koj xav tias koj thoob tsib dua Das
Nes lawm. Tsis muaj ib yam zais ntshis
uas koj yuav daws tsis tau.

4 Koj kev thoob tsib kev ntse ua kom koj
yog ib tug neeg nplua nuj. Koj tej nyiaj
tej kub, koj muab khaws cia puv txhab.

5 Koj tau cuab yeej cuab tam ntau, vim
koj txawj ua luam tas nrho ! Ces koj ua
neeg muab hlob vim koj nplua nuj.

6 Vim li ntawd, HUAB TAIS Tswv Ntuj
hais li no : koj xav coj ib lub siab xws li
ib tug Tswv Ntuj lub.

7 Vim li ntawd mas kuv yuav xa ib co
pej kum neeg tuaj ntaus koj. Yog lub kuj
cuab nyoos tshaj tej. Lawv yuav rho ntaj
tua koj kev thoob tsib. Lawv yuav rhuav
koj lub hwj chim.

8 Lawv yuav thawb koj mus nram kwj
ha, koj yuav tuag txom nyem ntsuav hauv
qab tiv txwv.

9 Koj puas tseem yuav hais rau cov tua
koj tias : kuv yog ib tug tswv ntuj ?
Koj puas yog ib tug neeg xwb, koj tsis

yog ib tug tswv ntuj lawm, koj nyob hauv cov neeg chob koj lawv xib teg. 10 Koj yuav tuag zoo li cov neeg tsis tau txais lub cim txiav. Cov pej kum neeg yuav muab koj tua. Kuv yog HUAB TAIS, kuv hais cov lus ntawd."

Tus nab qa dej. 32 : 1 - 14.

32

1 Hnub xiab 1, lub 12 hlis xyoo

12, kuv txais HUAB TAIS ib lo lus li no: 2 Neeg leej tub, koj yuav nqua suab hais ib zag seev txog Fas Las Oos, uas yog tus vaj Hais Nkws Tos. Koj yuav hais rau nws tias :

"Me nyuam thav tsow kav tsoom haiv neeg, nyem no koj ntog lawm ! Los txog tav no koj zoo xws li tus nab qa dej, koj tshuab pa hauv koj qhov ntswg tuaj, koj ko taw ua kom dej nro, koj ua kom dej ua zog."

3 HUAB TAIS Tswv Ntuj hais li no :

"Kuv yuav nthuav kuv lub vas rau ntau haiv neeg tuav, lawv yuav puav koj nyob hauv kuv lub vas rub los rau saum av.

4 Kuv yuav cia koj nyob saum nruab nqhuab, kuv yuav muab koj pov tseg rau saum npoo av, kuv yuav cia tas tsoom noog ya saum ntuj los tsaws saum koj, kuv yuav cia tas tsoom tsiaj nyob hauv av tuaj noj koj kom tsau.

5 Kuv yuav muab koj tej nqaij mus pov puv roob, muab koj tej pob txha mus pov puv hav. 6 Kuv yuav muab cov kua ntws ntawm koj los ywg lub teb chaws, muab koj cov ntshav ywg rau cov roob kom ntws lug mus puv cov kwj ha.

7 Thaum koj txoj sia yuav tu, mas kuv yuav ua kom lub ntuj tsaus, kom cov hnub qub yuav tsis ci ntxiv, kuv yuav kom huab los thaiv lub hnub, kom lub hli tsis txhob qaim li.

8 Tas tsoom hnub qub nyob saum ntuj

yuav tsaus nti vim koj. Kuv yuav tso qhov tsaus ntuj los vov koj lub teb chaws. Yog HUAB TAIS Tswv Ntuj lo lus.

9 Ntau haiv neeg yuav tu siab thaum kuv coj koj tsoom pej xeem mus nyob txim pej kum teb, mus nyob tej lub teb chaws koj tsis paub.

10 Thaum lawv hnov hais txog koj, thaum kuv tsa kuv rab ntaj rau saum lawv, mas ntau haiv neeg yuav ntshai tshee na vim koj. Hnub koj yuav vau, lawv yuav tshee mus li, sawv daws yuav ntshai tuav siav rawv.

11 HUAB TAIS Tswv Ntuj hais zoo li no : Tus vaj Npas Npis Los rab ntaj yuav caum koj. 12 Kuv yuav cia cov tub rog xuas ntaj tua koj cov pej xeem coob coob. Yog cov neeg uas qus tshaj. Lawv yuav qhau Hais Nkws Tos txoj kev muab hlob. Tas tsoom pej xeem yuav tuag tas. 13 Cov tsiaj yuav tuag tas nyob ze cov dej tob. Neeg ko taw thiab cov tsiaj ko taw yuav tsis tau tsuj tej dej kom nro ntxiv. 14 Ces kuv yuav ua kom dej tus yees, kom dej ntws li roj.

HUAB TAIS Tswv Ntuj hais li ntawd.

Tus Yaj Saub yog zoo li tus zov keeb, nws yuav qhia cov His Xas Lais. 33 : 2 - 9.

33

2 Neeg leej tub, koj mus hais rau

koj haiv neeg tias : Thaum kuv cia muaj tsov muaj rog tuaj txog ib lub teb chaws mas cov neeg nyob hauv lub teb chaws ntawd xaiv ib tug neeg los zov keeb.

3 Yog nws pom rog tuaj txog ze mas nws tshuab raj kub twg ceeb toom rau tsoom pej xeem hnov. 4 Muaj ib tug neeg nws hnov raj kub twg nrov tab sis nws tsis ceev faj mas rab ntaj tuaj muab nws tua tuag. Mas tus neeg ntawd tej roj ntsha

yuav rov poob nyob saum nws xwb.
 5 Nws tau hnov raj kub tshis nrov, vim
 nws tsis ceev faj mas nws cov ntshav
 yuav rov poob rau saum nws xwb. Tab
 sis tus tau hnov thiab nws muab siab rau
 mas nws txoj sia yuav tsis ploj.

6 Yog tias tus zov keeb pom rab ntaj tuaj
 ze, tab sis nws tsis tshuab raj kub tshis
 ceeb toom rau tsoom pej xeem paub, ces
 thaum rab ntaj tuaj txog, luag tua lawv ib
 tug tuag lawm, mas tus tuag ntawd nws
 tuag vim nws tsis ceev faj, tab sis kuv
 yuav nug txog nws nqi taub hau ntawm
 tus zov keeb.

7 Neeg leej tub, kuv tau tsa koj ua tus
 peeb zov His Xas Lais lub tsev. Thaum
 koj hnov kuv lub ncauj hais ib lo lus mas
 koj yuav qhia lawv paub.

8 Yog kuv hais rau tus siab phem tias :
 "Neeg siab phem, koj yuav tuag !"
 Tab sis koj tsis qhia tus siab phem kom
 nws tso nws qhov phem tseg, mas yog tus
 siab phem yuav tuag vim nws cov
 txhaum, tab sis kuv yuav nug koj txog
 nws txoj sia, ces koj yuav tsum them.

9 Yog koj xub qhia tus siab phem kom
 nws tso qhov phem tseg thiab tig los yuav
 lub siab tshiab, tab sis nws tsis tig los
 yuav lub siab tshiab, mas nws yuav tuag
 vim nws muaj txhaum.

Hos koj yuav cawm koj txoj sia.

Cov zov His Xas Lais.

34 : 1 - 16 + 23 - 31.

34 1 Kuv txais HUAB TAIS lo lus
 no : 2 Neeg leej tub, koj ua yaj
 saub cem cov tswv zov yaj His Xas Lais,
 koj ua yaj saub mas ! Koj tshaj rau lawv
 tias:

"Cov tswv zov yaj, HUAB TAIS hais li
 no : cov tswv zov yaj txoj hmoov yuav
 phem. Vim lawv tsuas noj zaub rau lawv

xwb. Cov tswv zov yaj tsis coj pab yaj
 mus nog zaub lod ?"

3 Nej tau haus yaj mis, hnav plaub yaj,
 muab cov yaj rog tshaj los ua txim, tab sis
 nej tsis tau coj pab yaj mus nog zaub.

4 Nej tsis tau ntxiv zog pab cov yaj nka
 nka, tsis tau kho tus yaj mob, tsis tau
 qhvw tus yaj raug mob lub qhov txhab.
 Nej tsis tau mus coj tus yaj yuam kev
 kom rov los, tsis tau mus nrhiav tus yaj
 poob zoo. Nej tsuas tau ua siab heev saib
 lawv xwb.

5 Lawv tau tawg ua pab ua pawg mus
 poob rau tsiaj qus ncauj, vim tsis muaj
 tus tswv zov pab yaj ntawd. Lawv thiaj
 tau tawg ua lwj ua liam. 6 Nyob saum
 tej laj roob thiab pem toj siab, kuv pab yaj
 mus mus los los tas qhov txhia chaw, kuv
 pab yaj tawg ua lwj ua liam mus puv lub
 teb chaws. Tsis muaj leej twg yuav saib
 xyuas lawv, tsis muaj leej twg yuav mus
 xauj mus nrhiav.

7 Cov neeg zov yaj, nej tig ntsej los
 mloog HUAB TAIS lo lus kom zoo mas !

8 Kuv yog tus HUAB TAIS Tswv Ntuj
 muaj txoj sia nyob. Kuv cog lus li no :
 kuv pab yaj tau raug luag nyiag, tau poob
 rau tsiaj qus lub ncauj vim tsis muaj tus
 tswv saib. Kuv cov tswv zov yaj tsis saib
 tsis xyuas kuv pab yaj, lawv nog lawv
 zaub, lawv tsis coj kuv pab yaj mus nog
 zaub.

9 Cov tswv zov yaj, nej tig ntsej los
 mloog HUAB TAIS lo lus kom zoo mog !
 HUAB TAIS Tswv Ntuj hais li no :
 Zaum no, kuv yuav npau taws rau cov
 tswv zov yaj. Kuv yuav rov thim kuv pab
 yaj. Kuv yuav txwv tsis pub lawv coj kuv
 pab yaj mus nog zaub. Ces lawv yuav
 tsis nog zaub rau lawv. Kuv yuav thau
 kuv cov yaj ntawm lawv qhov ncauj. Kuv
 cov yaj yuav tsis yog ib co tsiaj uas lawv
 noj.

- 11 HUAB TAIS Tswv Ntuj hais li no : Zaum no, tus yuav tsob hwb kuv pab yaj yog kuv. Kuv yuav mus tshuaj xyuas.
- 12 Kuv yuav mus tshuaj xyuas kuv pab yaj zoo li ib tug tswv zov yaj, thaum nws rov nrhiav tau nws cov yaj uas tawg ua lwj ua liam, thaum uas ntuj tsaus pos huab nti.
- 13 Kuv yuav kom lawv tsiv ntawm cov haiiv neeg uas lawv nrog nyob, kuv yuav sau lawv ntawm pej kum teb los, kuv yuav coj lawv rov los rau hauv lawv thaj av. Kuv yuav cia lawv nog zaub nyob pem His Xas Lais tej hauv roob, nram tej vos hav thiab tas qhov txhia chaw uas muaj neeg nyob hauv lub teb chaws.
- 14 Kuv yuav cia lawv nog zaub nyob hauv ib thaj chaw zaub mos nyoos, thiab His Xas Lais tej hauv roob yuav yog lawv chaw nog zaub uas lawv yuav tau so dhuav. Kuv pab yaj yuav nog tej hav nyom ntsuab xiab saum His Xas Lais tej toj roob.
- 15 HUAB TAIS Tswv Ntuj hais li no: Yog kuv yuav coj kuv cov yaj mus nog zaub, thiab ua kom lawv tau so.
- 16 Kuv yuav nrhiav tus poob zoo, kuv yuav coj tus ncaim npoj rov los poo npoj, kuv yuav qhwv tus raug qhov txhab, kuv yuav kho tus muaj mob kom zoo. Tus yaj rog thiab noj qab nyob zoo kuv yuav saib xyuas nws. Kuv yuav coj cov yaj mus nog zaub raws txoj kev ncaj.
- 23 Kuv yuav ua kom muaj ib tug tswv zov yaj sawv los thiab kuv yuav tsa nws ua pab yaj ntej, coj lawv mus nog zaub, yog kuv leej tub txib Das Vis. Nws yuav coj cov yaj mus nog zaub thiab nws yuav ua tus tswv zov lawv. 24 Kuv, HUAB TAIS, yuav yog lawv tus Tswv Ntuj, hos kuv leej tub txib Das Vis yuav ua vaj nyob nruab nrab hauv lawv. Kuv, HUAB TAIS, hais li ntawd.
- 25 Kuv yuav nrog lawv cog lus kom lawv tau nyob thaj yeeb. Kuv yuav ua kom cov tsiaj qus tom neeg ploj hauv lub teb chaws. Kuv cov yaj yuav tau nyob nyab xeeb hauv teb chaws suab puam, lawv yuav pw xub zoov xub tsuag tau.
- 26 Kuv yuav coj lawv los nyob ib ncig ntawm kuv lub pov roob. Kuv yuav tso nag los kom haum caij, yuav yog ib co nag foom koob foom hmoov.
- 27 Tsob txiv hauv nras liaj yuav txi, thaj av yuav ciaj qoob loo, ces cov yaj yuav tau nyob nyab xeeb saum lawv thaj av. Thaum kuv yuav txiav tej hlua khi lawv tus quab kom tu, thaum kuv thau lawv ntawm cov neeg yuam lawv ua qhev txhais tes los mas luag tej thiaj yuav paub tias kuv yog HUAB TAIS. 28 Txij no mus lawv yuav tsis yog lub teb chaws uas pej kum haiv neeg sib txeeb. Thiab cov tsiaj qus hauv lub teb chaws yuav tsis tom lawv lawm. Lawv yuav tau nyob nyab xeeb, yuav tsis muaj tus tuaj zes lawv.
- 29 Kuv yuav ua kom ib lub vaj txiv ntoo nto moo hlob tuaj yug lawv. Yuav tsis muaj neeg tuag tshaib tuag nqhis nyob hauv lub teb chaws lawm. Lawv yuav tsis raug pej kum haiv neeg tsawm.
- 30 Luag ob cag yuav paub tias lawv tus Tswv Ntuj yog kuv, kuv ib txwm nrog lawv nyob thiab tas His Xas Lais tsev neeg yog kuv haiv neeg.
- HUAB TAIS Tswv Ntuj hais li ntawd.
- 31 Nej sawv daws yog kuv pab yaj, nej yog pab neeg uas kuv coj mus nog zaub. HUAB TAIS Tswv Ntuj hais li ntawd.
- Tswv Ntuj yuav cawm cov His Xas Lais vim nws xav txuag nws lub npe. 36 : 16 - 28.**
- 36** 16 Kuv txais HUAB TAIS ib lo lus li no : 17 Neeg leej tub,

thaud, tsoom His Xas Lais nyob txawm hauv lawv teb chaws. Lawv tus yam ntxwv thiab lawv tej hauj lwm ua kom lawv lub teb chaws sw tas. Lawv tus yam ntxwv nyob ntawm kuv xub ntiag yog zoo li ib tug poj niam cev tsis huv.

18 Kuv thiaj tau tso kuv lub siab npau rau lawv, vim lawv ua luag roj ntsha ntws nyob hauv lawv teb chaws, lawv muab tej tus mlom dab los ua kom lawv teb chaws sw.

19 Kuv ua kom cov His Xas Lais sib ncaim mus nyob hauv nruab nrab cov kuj cuab. Kuv muab lawv w mus rau pej kum teb. Kuv tau txiav txim rau lawv raws lawv tus yam ntxwv thiab lawv tes dej num.

20 Lawv tuaj nyob pej kum teb, lawv tseem ua puas kuv lub npe ntshiab. Lawv ua kom pej kum haiv neeg hais tias : Yog HUAB TAIS haiv neeg, lawv tawm hauv nws lub teb chaws tuaj nyob qhov no."

21 Tab sis kuv txuag kuv lub npe ntshiab, uas His Xas Lais ua kom puas rau hauv cov kuj cuab ua lawv tuaj nyob. 22 Koj mus hais rau tsoom His Xas Lais tias :

"Huab Tais Tswv Ntuj hais li no : His Xas Lais tsev neeg, tsis yog vim nej ces kuv thiaj ua zoo li no, yog vim kuv lub npe ntshiab uas nej tau ua puas nyob hauv cov kuj cuab uas nej tuaj nyob. 23 Kuv yuav ua kom kuv lub npe loj ntshiab tuaj, vim nej tau ua kom kuv lub npe puas nyob hauv cov kuj cuab nej tuaj nyob. Cov kuj cuab thiaj yuav paub tias kuv yog HUAB TAIS. HUAB TAIS Tswv Ntuj hais zoo li ntawd. Kuv yuav ua kom kuv lub siab ntshiab ci tuaj rau lawv qhov muag pom. 24 Thaum ntawd kuv yuav thau nej hauv cov kuj cuab los, kuv yuav sau nej ntawm pej kum teb los nyob ua ke, kuv yuav coj nej rov los nyob hauv

nej thaj av. 25 Kuv yuav hliv dej ntshiab ntws tuaj saum nej, ces nej yuav huv tuaj. Kuv yuav so nej tej yam sw thiab nej tej mlom dab pov tseg kom nej huv tuaj.

26 Kuv yuav pub ib lub siab tshiab rau nej, kuv yuav dawj nej lub siab tawv li zeb, kuv yuav cog ib lub siab muag li nqaij nyob hauv nej lub cev.

27 Kuv yuav muab kuv lub tswv yim rau hauv nej. Kuv yuav ua kom nej mus raws kuv tej lij choj, thiab kom nej coj kuv tej kev cai. 28 Nej yuav tau nyob hauv lub teb chaws uas kuv muab rau nej phaj txiv thiab phaj yawg. Nej yuav yog kuv haiv neeg. Kuv yuav yog nej tus Tswv Ntuj."

Cov pob txha neeg hauv lub vos hav. 37 : 1 - 14.

37 1 HUAB TAIS txhais tes roos kuv thiab nws lub tswv yim coj kuv mus tsaws rau hauv ib lub vos hav muaj pob txha ntsawm nkaus.

2 HUAB TAIS kom kuv mus mus los los hauv nruab nrab cov pob txha. Cov pob txha ntau kawg puv ntia saum tej npoo av hauv lub vos hav. Yog ib co pob txha qhuav qhuav xwb.

3 HUAB TAIS hais rau kuv tias : "Neeg leej tub, cov pob txha ntawd puas yuav muaj txoj sia tau ?"

Kuv teb tias : "HUAB TAIS Tswv Ntuj, koj thiaj paub."

4 Nws hais rau kuv tias : "Koj ua yaj saub tshaj lus rau cov pob txha. Koj hais rau lawv tias : Pob txha qhuav, nej mloog HUAB TAIS lo lus !"

5 HUAB TAIS Tswv Ntuj hais rau cov pob txha li no :

"Kuv yuav tshuab pa mus hauv nej ces nej yuav muaj sia. 6 Kuv yuav muab leeg los lo rau nej, kuv yuav ua kom nej tej nqaij hlav, kuv yuav muab tawv mos

los plooj nej, kuv yuav ua kom nej ua pa tau, ces nej yuav muaj sia. Nej thiaj yuav paub tias kuv yog HUAB TAIS."

7 Kuv tau ua yaj saub tshaj raws li Tswv Ntuj qhia kuv. Ces thaum kuv tab tom ua yaj saub tshaj lus, mas kuv txawm hnov nrov nroo ntws tuaj. Lub vos hav tshee tshee, cov pob txha ua zog thiab txav los sib dhos. 8 Kuv ntsia pom : lawv muaj leeg, nqaij xeeb tuaj vov tas, tawv hlav tuaj qhvw. Tab sis tsis muaj pa nyob hauv lawv.

9 Tswv Ntuj hais rau kuv tias :

"Neeg leej tub, koj ua yaj saub tshaj lus rau txoj pa mas ! Koj ua yaj saub mas ! Koj hais li no rau txoj pa : HUAB TAIS Tswv Ntuj hais lo lus no : Txoj pa, koj tshuab tuaj ntawm plaub ceg kaum ntuj tuaj ! Koj tshuab rau saum cov tub tuag no kom lawv muaj txoj sia."

10 Kuv ua yaj saub tshaj raws li Tswv Ntuj qhia. Ces txoj pa thiaj tuaj rau hauv cov tub tuag. Lawv rov muaj sia tuaj thiab lawv sawv ntseg ntswb ntsees, zoo li ib npoj tub rog coob tas nrho.

11 Tswv Ntuj hais rau kuv tias :

"Neeg leej tub, cov pob txha no yog tas nrho His Xas Lais tsev neeg. Lawv niaj hnub hais tias : 'Peb cov pob txha qhuav tas ! Peb txoj kev tso siab puas tas ! Peb yuav tuag tu noob !' 12 Vim li ntawd, koj thiaj yuav ua yaj saub tshaj rau lawv.

Koj hais rau lawv tias : HUAB TAIS Tswv Ntuj hais li no : Nej ntsia saib ! Kuv haiv neeg, kuv yuav qhib nej cov rooj ntxas. Kuv yuav coj nej rov mus rau His Xas Lais thaj av. 13 Kuv haiv neeg, thaum kuv yuav qhib nej cov rooj ntxas thiab kuv tsa nej sawv hauv qhov ntxa los, mas nej yuav paub tias kuv yog HUAB TAIS. 14 Kuv yuav tso kuv txoj pa mus hauv nej ces nej yuav rov muaj txoj sia. Kuv yuav tsa nej nyob txawm

hauv nej thaj av. Nej yuav paub tias kuv yog HUAB TAIS, kuv hais yam twg mas kuv ua yam twg.

Yog HUAB TAIS hais lo lus ntawd."

Muab ob daig txiag ntoo los ua ke.

37 : 15 - 19 + 21 - 28.

15 Kuv txais HUAB TAIS ib lo lus zoo li no: 16 Neeg leej tub, koj mus khaws ib daig txiag ntoo los, koj sau rau saud tias: "Daim no yog Yus Das thiab cov His Xas Lais nrog Yus Das nyob."

Koj ho khaws dua ib daig los sau rau saud tias :

"Daim no, yog Yos Xes, Es Fais tus cag, thiab tas His Xas Lais tsev neeg nrog Yos Xes nyob."

17 Koj muab ob daig txiag ntawd los sib dhos kom ua ib daig nyob hauv koj txhais tes xwb. 18 Thaum koj haiv neeg nug koj tias : "Koj puas qhia peb tias koj xav hais dab tsi ?"

19 Koj yuav hais rau lawv tias : "HUAB TAIS Tswv Ntuj hais li no : Kuv yuav muab Yos Xes tus ntoo uas Es Fais tuav thiab cov xeem His Xas Lais uas tawm hauv Yos Xes los, lo rau Yus Das tus ntoo, ces kuv yuav muab los ua tib tug ntoo xwb rau hauv kuv txhais tes."

21 Ces koj hais rau tsoom His Xas Lais tias :

"HUAB TAIS hais li no : Kuv yuav mus coj tsoom His Xas Lais uas lawv mus nyob hauv cov kuj cuab. Kuv yuav sau lawv nyob tas qhov txhia chaw rov los rau hauv lawv thaj av. 22 Kuv yuav cia lawv ua ib lub kuj cuab xwb nyob hauv lub teb chaws, nyob saum cov roob His Xas Lais. Ib tug vaj xwb yuav ua sawv daws tus vaj. Lawv yuav tsis sib faib ua ob haiv neeg nyob ob lub teb chaws lawm.

23 Lawv yuav tsis rov ua kom lawv phem tuaj ntxiv, lawv yuav tsis ua lawv tej niag kab ke teev mlom thiab lawv yuav tsis muab neeg tua ntxiv. Kuv yuav cawm lawv ntawm lawv txoj kev fav xeeb. Kuv yuav ntxuav lawv kom huv tuaj. Ces lawv yuav ua kuv haiv neeg, kuv yuav ua lawv tus Tswv Ntuj. 24 Kuv tus tub txib Das Vis yuav kav lawv. Tsuas yuav muaj ib tug tswv zov yaj saib sawv daws. Lawv yuav mloog kuv tej kev cai lij choj, lawv yuav coj kuv Txoj Cai.

25 Lawv yuav nyob txawm hauv lub teb chaws kuv muab rau kuv tus tub txib Yas Kos, yog lub teb chaws uas nej cov yawg koob tau nyob. Lawv cov tub ki xeeb zeej xeeb ntxwv yuav nyob ntawd mus li txheej dhau txheej. Kuv tus tub txib Das Vis yuav ua lawv tus vaj mus li.

26 Kuv yuav nrog lawv cog lus nyob hauv txoj kev thaj yeeb, zaj cog lus ntawd yuav nyob mus li. Kuv yuav cia lawv tsa cuab tsa yim, kuv yuav tsa lawv nyob khov kho, kom lawv huam vam mus. Kuv yuav tsa kuv lub tsev ntshiab nyob nruab nrab hauv lawv mus li.

27 Kuv yuav tsa kuv lub tsev roos lawv. Kuv yuav yog lawv tus Tswv Ntuj. Lawv yuav yog kuv haiv neeg. 28 Ces cov kuj cuab yuav paub tias kuv yog HUAB TAIS, yog tus ua kom His Xas Lais ntshiab tuaj, vim kuv lub tsev ntshiab nyob nruab nrab hauv lawv mus li."

HUAB TAIS lub hwj chim rov qab los nyob Yes Lus Xas Les.

43 : 1 - 7 + 9.

43 1 HUAB TAIS coj kuv mus rau ntawm lub qhov rooj uas tig rau sab hnub tuaj. 2 Kuv pom cov His Xas Lais tus Tswv Ntuj lub hwj chim tawm

tim phab hnub tuaj tuaj. Kuv hnov nrov nroo ntws xws li ib lub suab dej loj nrov tuaj thiab nws lub hwj chim ua lub ntiaj teb ci ntsa iab tuaj.

3 Pom kiag qhov ntawd, kuv nco dheev txog tej yam uas thaud kuv tuaj saib luag rhuav lub tsheet kuv tau pom los. Thiab kuv rov nco txog tej yam uas kuv tau pom nyob ntawm tus niam dej Kes Npas. Ces kuv khoov pe ntsej muag ti av.

4 HUAB TAIS lub hwj chim tuaj hla dhau lub qhov rooj uas tig rau sab hnub tuaj mus rau hauv lub Tuam Tsev Teev Ntuj lawm. 5 Lub tswv yim nqa kuv mus txog hauv lub plawv tsev. Kuv pom HUAB TAIS lub hwj chim ci thoob lub Tuam Tsev.

6 Kuv hnov ib tug neeg lub suab hu kuv hauv Tuam Tsev tuaj, tab sis tus neeg ntawd ho nyob ze kuv.

7 Lub suab ntawd hais tias :

"Neeg leej tub, kuv lub theej kiab nyob ntawm no. Thaj tsam no yog qhov chaw kuv tiag kuv xib taws. Kuv yuav nyob ntawm no nrog tsoom His Xas Lais mus txheej dhau txheej. His Xas Lais tsev neeg thiab His Xas Lais cov vaj lawv yuav tsis muab lawv txoj kev ua neeg teev dab los ua kom kuv lub npe ntshiab sw tuaj ntxiv.

9 Txij no mus, cov His Xas Lais yuav muab lawv txoj kev ua neeg ntiaj teev dab tshem mus deb ntawm kuv. Lawv yuav tshem cov vaj lub cev tuag mus deb ntawm kuv. Ces kuv yuav nrog lawv nyob txawm mus txheej dhau txheej."

Tus dej txhawv hauv lub Tuam Tsev Teev Ntuj los. 47 : 1 - 9 + 12.

47 1 Tus neeg ntawd coj kuv rov los txog ntawm lub qhov rooj mus hauv lub Tuam Tsev Teev Ntuj. Ua

ciav muaj ib tug dej ntws hauv taw rooj los dua sab hnub tuaj lawm, vim lub Tuam Tsev tig mus rau sab hnub tuaj lawm. Dej txhawv ntawm sab qab tsuas lub Tuam Tsev Teev Ntuj sab xis nram lub qab thaj txi Ntuj.

2 Tus neeg coj kuv tawm ntawm lub qhov rooj nyob sab pej los, nws coj kuv ncig sab Tuam Tsev nraud los txog ntawm lub rooj vag uas tig rau sab hnub tuaj. Nyob ntawd, dej ntws ntawm sab xis los.

3 Tus neeg ntawd txav mus dua sab hnub tuaj lawm, nws nqa ib txog hlua ntawm tes, nws ntsuas ntev li ib txhiab tshim, ces nws kom kuv hla dej. Dej vov kuv qij taw tas.

4 Nws rov ntsuas ib txhiab tshim ntxiv thiab kom kuv hla. Dej nce txij kuv hauv caug. Nws rov ntsuas dua ib txhiab tshim. Nws kom kuv hla. Dej txij kuv duav lawm. 5 Nws tseem rov qab ntsuas dua ib txhiab tshim ntxiv. Thaum ntawd cia li yog ib tug dej loj kuv hla tsis taus vim tus dej hlob thiab tob lawm, yog ib tug dej hla tsis tau li.

6 Ces tus neeg hais rau kuv tias : " Neeg leej tub, Koj puas pom?" Nws thiaj coj kuv rov los rau tim ntug dej. 7 Thaum kuv los txog, mas nyob ntawm ob sab ntug dej muaj ib co ntoo ntau ntau. 8 Tus neeg ntawd hais rau kuv tias : "Cov dej no ntws mus rau toob fab mus nram lub hav As Las Npas, yuav mus tshwm rau hauv lub hiav txwv. Cov dej no mus ua kom lub hiav txwv cov dej huv tuaj. 9 Tus dej no ntws txog qhov twg mas tas puas tsav yam muaj txoj sia mus mus los los yuav ciaj nyob hauv cov dej no. Yuav muaj ntses ntau heev vim tus dej no ntws mus txog qhov twg mas yam twg yuav huv tuaj thiab txoj sia hlob taus. 12 Nyob ntawm ob sab ntug dej yuav tuaj tas puas tsav yam txiv ntoo, lawv cov nplooj yuav tsis zeeg ib zaug thiab lawv yuav txi txiv mus li. Niaj hli lawv yuav txi ib co txiv tshiab, vim cov dej ntws ntawm thaj chaw ntshiab los. Cov txiv yuav yog ib co txhiam xws, cov nplooj yuav yog ib co tshuaj."